



四川大學古籍整理研究所編

儒藏

史部
第二四冊

四川大學出版社



四川大學古籍整理研究所 編

儒藏·史部

儒林史傳

第二十四冊

四川大學出版社 二〇〇八年

國家「211工程」重點學科建設項目

國家「985工程」創新基地規劃項目

中國孔子基金會重大項目



目 錄

學統續
清・熊賜履
編撰

.....

學統卷之三

孝昌熊賜履敬修甫編

正統

曾子

曾子名參、字子輿、魯南武城人、鄒國之後也。夏禹出自軒轅氏、其孫少康封其次子曲烈於鄒、子孫因其封國爲氏、遂爲鄒姓。歷夏、商、周、世次無考。魯襄公時、邾人莒人滅鄒、世子巫公奔魯、因歎曰、國旣滅矣、邑亦宐除。遂去邑而爲曾氏、則曾氏之始祖也。巫公生



天、天生阜、阜生點。點以周敬王十五年，卽魯定公三年生。曾子於魯，少孔子四十六歲。曾子資稟篤實，天性至孝。十四歲，嘗出薪於野，有客至，母以手搯其臂，曾子心動，棄薪馳歸，問母無恙乎。母曰：有客至，故搯臂以呼汝爾。耕泰山下，雨雪旬日不得歸，思父母作梁山之歌。往鄭，至勝母里，還車不入，惡其名也。十七歲，以父命從學孔子於楚。孔子曰：參也魯。曾子見孔子，未嘗不問安親之道。在楚心動，歸問其母，母曰：思之。齧指。孔子聞之曰：參之至誠，精感萬里。曾子曰：吾



日三省吾身爲人謀而不忠乎、與朋友交而不信乎、傳不習乎。十八歲從孔子於衛。孔子稱顏回有君子之道四、史鮒有君子之道三。曾子曰、參嘗聞夫子之三言、而未之能行也。夫子見人之一善而忘其百非、是夫子之易事也。見人之善若已有之、是夫子之不爭也。聞善必躬行之、然後導之、是夫子之能勞也。學夫子之三言、而未能行、是以自知終不及二子也。曾子曰、入是國也、言信乎群臣、則畱可也。忠信行乎群臣、則仕可也。澤加於百姓、則安可也。孔子曰、參之言、

可謂善安身矣。二十二歲從孔子自衛反魯。時季康子朝服以縞。曾子問於孔子曰。禮乎。孔子曰。諸侯皮弁告朔。然服之以視朝。若此禮者也。曾子敝衣而耕於魯。魯君聞之而致邑焉。曾子固辭不受。使者曰。先生非有求於人。人則獻之。奚爲不受。曾子曰。吾聞受人施者常畏人。與人者常驕人。縱君不我驕也。吾豈能勿畏乎。吾與其富而畏人。不若貧而無屈。孔子聞之曰。參之言。足以全其節矣。曾子養親。必有酒肉。將徹。必請所與。問有餘。必曰有。人以爲養志。曾子嘗芸



瓜、誤斷其根、父暫怒、杖擊其背、曾子仆地、有頃乃甦、欣然而起、進曰、大人用力教參、得無疾乎。退、援琴而歌、欲父知其平也。孔子聞之、謂門弟子曰、參來、勿內也。曾子使人請於孔子、孔子曰、女不聞乎、昔舜事瞽瞍、欲使之、未嘗不在側。索而殺之、未嘗可得。小杖則受、大杖則走。故瞽瞍不犯不父之罪、舜不失烝烝之孝。今參委身以待暴怒、而陷父於不義、安得爲孝乎。曾子聞之、謝過曰、參罪大矣。曾子問冠昏喪祭吉凶變禮、孔子並詳告之、語具載記。曾子問王言、孔子曰、

昔者明王內修七教、外行三至。七教修、然後可以守。三至行、然後可以征。故曰、內修七教而上不勞、外行三至而財不費、此之謂明王之道也。語具家語。子貢謂衛將軍文子曰、滿而不盈、實而若虛、過之如不及、博無不學、其貌恭、其德敦、其於人也無所不信、其驕大人也常以浩浩、是曾參之行也。孔子稱之曰、孝德之始也。弟、德之序也。信、德之厚也。忠、德之正也。參中乎四德者也。二十四歲、是年、顏子卒於魯。其明年、曾子追思顏子曰、以能問於不能、以多問於寡、有若無、



實若虛、犯而不校。昔者吾友嘗從事於斯矣。二十六
歲、孔子呼而告之曰、參乎、吾道一以貫之。曾子曰、唯。
孔子出、門人問曰、何謂也。曾子曰、夫子之道、忠恕而
已矣。孔子以大學授曾子、曾子首述孔子之言、爲經
一章、以明大學之道。其道有三綱、曰明德、新民、止至
善。有八條、曰格物、致知、誠意、正心、修身、齊家、治國、平
天下。而歸本於修身、蓋修身卽明德也。又以己意爲
傳十章、以分釋之。舉內聖外王、本末始終之義悉備
焉。語具大學。孔子又以曾子能通孝道、授之以孝經。

一日曾子侍側。孔子謂之曰。參。先王有至德要道。以順天下。民用和睦。上下無怨。女知之乎。曾子避席曰。參不敏。何足以知之。孔子曰。夫孝。德之本也。教之所由生也。復坐。吾語女。語具孝經。孔子嘗曰。吾志在春秋。行在孝經。春秋屬商。孝經屬參云。時齊欲聘曾子爲卿。曾子不就。曰。吾父母老。食人之祿。則憂人之事。故不忍遠親而爲人役。曾子曰。狎甚則相簡。莊甚則不親。是故君子之狎足以交懽。其莊足以成禮。孔子聞之曰。二三子識之。孰謂參也不知禮乎。二十七歲。



魯哀公十六年也。是年孔子卒。曾子心喪三年。三十歲心喪三年畢。子夏、子游、子張以有若似聖人。欲以所事孔子事之。強曾子。曾子曰。不可。江漢以濯之。秋陽以暴之。皜皜乎不可尚已。曾子曰。先王所以治天下者五。貴德、貴貴、貴老、敬長、慈幼。貴德爲其近於聖也。貴貴爲其近於君也。貴老爲其近於親也。敬長爲其近於兄也。慈幼爲其近於弟也。曾子曰。晏子可謂知禮也已。有若曰。晏子一狐裘三十年。遣車一乘。及墓而反。國君七個。遣車七乘。大夫五個。遣車五乘。晏

子焉知禮。曾子曰：國無道，君子恥盈禮焉。國奢則示之以儉，國儉則示之以禮。三十一歲，父皙卒，曾子執親之喪，水漿不入口者七日。葬父皙於南城山。曾子攀柩車，引輶者爲之止。或問曾子曰：夫旣遣而包其餘，猶旣食而褻其餘歟？君子旣食，則褻其餘乎？曾子曰：吾子不見大饗乎？夫大饗旣饗，卷三牲之俎，歸於賓館，父母而賓客之，所以爲哀也。子不見大饗乎？讀則，曾子曰：非古也，是再告也。曾子每讀喪禮，泣下沾襟。以父嗜羊棗，遂不忍食之，覩物思親也。三十八歲，

居武城、有越寇。或曰：「寇至，盍去諸。」曰：「無寓人於我室，毀傷其薪木。」寇退，則曰：「修我牆屋，我將反。」寇退，曾子反。左右曰：「待先生如此其忠且敬也。」寇至則先去，以爲民望。寇退則反，殆於不可。沈猶行曰：「是非汝所知也。」昔沈猶有負芻之禍，從先生者七十人，未有與焉。魯人攻鄆，曾子辭於鄆。君曰：「請出。」寇罷而後復來，毋使狗豕入吾舍。鄆君曰：「寡人之於先生也厚矣，人無不聞。今魯人攻我，而先生去，我安能守先生之舍也。」曾子不荅而出。及魯攻鄆，數之罪十，而曾子所諍者

九。魯師罷，鄆君復修會子舍而迎之。門弟子問於會子曰：「夫士何如則可謂達矣？」會子曰：「不能則學，疑則問，欲行則比賢。雖有險道，循行則達矣。今之弟子，病下人不知事，賢恥不知而又不問，欲作則其智不足，是以惑闇終其世而已矣。是謂窮民也。」會子妻以梨蒸不熟出之。人曰：「非七出也。」荅曰：「梨蒸小物爾，而不用吾命，況大事乎？」遂出之，終身不娶。子元請焉。會子告之曰：「高宗以後妻殺孝己，吉甫以後妻放伯奇，吾上不及高宗，中不比吉甫，容知其得免於非乎？」遂終



身不娶。子由問曰：哭父母有常聲乎？曾子曰：中道嬰兒失其母焉，何常聲之有？四十歲去魯適衛，其居衛也，緼袍無表，三日不舉火，十年不製衣。正冠而纓絕，捉衿而肘見，納屨而踵決。曳蹤而歌商頌，聲滿天地，若出金石。天子不得臣，諸侯不得友。曾子曰：士不可以不宏毅，任重而道遠。仁以爲己任，不亦重乎？死而後已，不亦遠乎？又曰：可以托六尺之孤，可以寄百里之命，臨大節而不可奪也，君子人與？君子人也。五十歲時，齊聘以相，楚迎以令尹，晉迎以上卿，曾子皆不